

**BOSNA I HERCEGOVINA
FEDERACIJA BOSNE I HERCEGOVINE
BOSANSKO – PODRINJSKI KANTON GORAŽDE
SKUPŠTINA KANTONA**

NACRT

**Z A K O N
O RADNO – PRAVNOM STATUSU ČLANOVA VLADE BOSANSKO –
PODRINJSKOG KANTONA GORAŽDE**

Goražde, decembar 2019. godine

Na osnovu poglavlja IV, odjeljak A, člana 23. tačka b) Ustava Bosansko – podrinjskog kantona Goražde (“Službene novine Bosansko – podrinjskog kantona Goražde”, broj: 8/98, 10/00 i 5/03) i člana 16. Zakona o Vladi Bosansko – podrinjskog kantona Goražde („Službene novine Bosansko – podrinjskog kantona Goražde“, broj:8/15), Skupština Bosansko – podrinjskog kantona Goražde, na sjednici održanoj dana _____. godine,
d o n o s i,

Z A K O N

O RADNO-PRAVNOM STATUSU ČLANOVA VLADE BOSANSKO – PODRINJSKOG KANTONA GORAŽDE

I. OSNOVNE ODREDBE

Član 1. **(Sadržaj Zakona)**

Ovim zakonom uređuje se radno-pravni status članova Vlade Bosansko – podrinjskog kantona Goražde (u daljnjem tekstu: članovi Vlade), koji se odnosi na plaće, naknade i druga prava iz radnog odnosa.

Član 2. **(Primjena drugih propisa)**

Na prava i obaveze koje se odnose na radno-pravni status članova Vlade, koja nisu uređena ovim zakonom, primjenjuju se propisi kojima se uređuju prava državnih službenika u organima državne službe u Federaciji, Bosansko – podrinjskom kantonu Goražde, kao i opći propisi o radu i kolektivni ugovori.

Član 3. **(Period ostvarivanja prava)**

Prava utvrđena ovim zakonom, Članovi Vlade ostvaruju za vrijeme trajanja svog mandata.

II. PRAVO NA PLAĆU, NAKNADU PLAĆE I DRUGA MATERIJALNA PRAVA

Član 4. **(Plaća i naknade)**

(1). Članovi Vlade imaju pravo na plaću i naknade, u skladu sa zakonom kojim se regulišu plaće i naknade u organima vlasti Bosansko – podrinjskog kantona Goražde (u daljem tekstu: Kanton).

(2). Članovi Vlade pravo na plaću ostvaruju od dana potvrđivanja imenovanja u Skupštini Bosansko – podrinjskog kantona Goražde (u daljnjem tekstu: Skupština).

Član 5. **(Izdavanje putnog naloga)**

(1) Putni nalog članovima Vlade izdaje premijer Kantona.

(2) Putni nalog premijeru Kantona izdaje sekretar Vlade.

Član 6.
(Ostale naknade)

Članovi Vlade imaju pravo na troškove reprezentacije, troškove mobilnog telefona i na upotrebu službenog automobila, u visini i na način koji svojim aktom utvrđuje Vlada.

III. DRUGA PRAVA ČLANOVA VLADE

Član 7.
(Radni staž i socijalno osiguranje)

(1) Članovima Vlade, vrijeme provedeno na radu, u smislu ovog zakona, uračunava se u radni staž.

(2) Radi ostvarivanja prava iz radnog odnosa, lica iz stava (1) ovog člana, dužni su Ministarstvu za pravosuđe, upravu i radne odnose Bosansko – podrinjskog kantona Goražde, dostaviti personalne dokumente, u zakonskom roku, danom stupanja na dužnost.

Član 8.
(Zdravstvena zaštita)

Za vrijeme provedeno na radu, članovi Vlade, ostvaruju prava iz radnog odnosa kao i pravo na zdravstvenu zaštitu i zdravstvenu zaštitu članova svoje porodice, u skladu sa općim propisima.

Član 9.
(Godišnji odmor)

Članovi Vlade imaju pravo na korištenje godišnjeg odmora u vrijeme koje odredi Vlada, u ukupnom trajanju do 36 radnih dana.

IV. RJEŠAVANJE O PRAVIMA I OBAVEZAMA

Član 10.
(Donošenje rješenja)

(1) O pojedinačnim pravima članova Vlade, utvrđenih ovim zakonom i drugim aktima, odlučuje rješenjem Komisija.

(2) Protiv rješenja iz stava (1) ovog člana, može se uložiti prigovor Komisiji.

(3) Rješenje Komisije po prigovoru je konačno.

Član 11.
(Primjena odgovarajućih propisa)

Za donošenje i dostavljanje rješenja iz člana 10. ovog zakona, primjenjuju se odgovarajuće odredbe zakona kojim se reguliše upravni postupak, a u pogledu rokova primjenjuju se odgovarajuće odredbe federalnog zakona, zakona Bosansko – podrinjskog kantona Goražde kojima je regulisano rješavanje prava i obaveza državnih službenika.

Član 12.

(Obavljanje personalnih poslova)

Ministarstvo za pravosuđe, upravu i radne odnose Bosansko – podrinjskog kantona Goražde obavlja personalne poslove za članove Vlade.

V. PRELAZNE I ZAVRŠNE ODREDBE

Član 13. (Donošenje provedbenih akata)

- (1) Vlada Kantona i Komisija dužni su donijeti akte za koje su ovlašteni ovim zakonom u roku od 60 dana od dana stupanja na snagu zakona.
- (2) Akti iz stava (1) ovog člana donose se uz predhodno mišljenje Ministarstva finansija.

Član 14. (Ravnopravnost spolova)

Gramatička terminologija u ovom zakonu podrazumijeva uključivanje oba spola.

Član 15. (Prestanak važenja zakona)

Danom stupanja na snagu ovog zakona prestaje primjena odredaba važećih propisa kojim su regulisana pitanja radno – pravnog statusa članova Vlade.

Član 16. (Stupanje na snagu Zakona)

Zakon o radno-pravnom statusu članova Vlade Bosansko – podrinjskog kantona Goražde stupa na snagu osmog dana od dana objavljivanja u “Službenim novinama Bosansko – podrinjskog kantona Goražde.”.

Broj:
Goražde,

Predsjedavajuća Skupštine

Edita Velić

OBRAZLOŽENJE

I PRAVNI OSNOV

Pravni osnov za donošenje Zakona o radno – pravnom status članova Vlade Bosansko – podrinjskog kantona Goražde sadržan je u članu 23. Ustava Bosansko – podrinjskog kantona Goražde (“Službene novine Bosansko – podrinjskog kantona Goražde”, broj: 8/98- prečišćeni tekst, 10/00 i 5/03) i članu 16. Zakona o Vladi Bosansko – podrinjskog kantona Goražde (“Službene novine Bosansko – podrinjskog kantona Goražde”, broj:8/15).

II RAZLOZI ZA DONOŠENJE

Zakon o radno – pravnom statusu članova Vlade planiran je kao normativni zadatak u Programu rada Skupštine I Vlade Bosansko – podrinjskog kantona Goražde za 2019. godinu. Takođe, u Zakonu o Vladi Bosansko – podrinjskog kantona Goražde u članu 16. utvrđeno je da će se radno – pravni status članova Vlade regulisati posebnim propisom.

Pored toga, ova oblast je bila regulisana u nekoliko propisa pa je bilo opravdano predložiti Zakon kojim će se radno – pravni status članova Vlade regulisati na takav način.

Obzirom na naprijed navedeno proizilazi potreba za donošenje gore pomenutog Zakona.

III OBRAZLOŽENJE PRAVNIH RJEŠENJA

I – Osnovne odredbe – član (1-3) – ovim odredbama uređuje se radno – pravni status članova vlade, propisi koji se primjenjuju na prava i obaveze članova Vlade, kao i period ostvarivanja tih prava.

II – Pravo na plaću, naknadu plaće i druga materijalna prava – član (4-6) – ovim odredbama regulisane su plaće i naknade, izdavanje putnog naloga te ostale naknade na koje imaju pravo članovi Vlade.

III – Druga prava članova Vlade - član (7-9) - utvrđen je radi staž i socijalno osiguranje, zdravstvena zaštita, te godišnji odmor.

IV – Rješavanje o pravima i obavezama - član (10-12) – ovim odredbama utvrđeno je ko donosi rješenja članovima Vlade o ostvarivanju pojedinačnih prava, primjena odgovarajućih propisa, te obavljanje personalnih poslova.

V – Prelazne i završne odredbe - član (13-16) – ovim odredbama utvrđen je rok u kojem je Vlada i Komisija dužna donijeti akte za koje je ovlaštena zakonom, ravnopravnost spolova, prestanak važenja važećih propisa kojim su regulisana pitanja radno – pravnog statusa članova Vlade, kao i stupanje na snagu ovog zakona.

III OČEKIVANI EFEKTI

Regulisanje radno – pravnog statusa članova Vlade na jedinstven način jednim propisom u cilju jednostavnije primjene.

IV FINANSIJSKI EFEKTI

Donošenje ovog Zakona ne iziskuje dodatna finansijska sredstva u Budžetu Bosansko – podrinjskog kantona Goražde.